

قصة حياة الشهيد جرجس سمير مجلي (غول الإيمان)

أحد شهداء مصر بليبيا



للكاتب

أ/ مايكل يوسف سلوانس

بيانات الكتاب

اسم الكتاب

قصة حياة الشهيد جرجس سمير مجلي (غول الإيمان) أحد شهداء مصر بلبيبا.

وصف الكتاب

الكتاب عبارة عن سيناريو درامي إذاعي يروي حياة الشهيد جرجس غول الإيمان

جميع الصور منشئة باستخدام أدوات الذكاء الإصطناعي وبالتالي هي صور غير حقيقية، تم استخدامها فقط كوسيلة تعليمية.

اسم الكاتب

أ/ مايكل يوسف سلوانس

سنة النشر

م ٢٠٢٦

• ملخص العمل :

في ليلة هادئة، يستيقظ رجلٌ مفزوعًا على صوت شابٍ غريب يقف أمامه، يتحدث بثقة وكأنه يعرفه منذ سنوات، ثم يختفي في لحظة... دون أن يخبره من يكون أو لماذا جاء. لم يبق سوى ملامح وجهه المحفورة في الذاكرة، وكلماتٍ أشعلت في القلب عشرات الأسئلة.

ومع رحلة البحث عن هوية هذا الشاب، يكتشف الرجل أنه الشهيد جرجس سمير مجلي، الشاب الصعيدي البسيط الذي وُلد في قرية سمسوم بمركز سمالوط بمحافظة المنيا عام ١٩٩١م، ونشأ في أسرة متواضعة تعيش على الكفاح والعمل. منذ طفولته تعلّق بالكنيسة وأحب الصلاة والخدمة، فرُسم شماسًا بكنيسة الشهيد مار جرجس في قريته، وعُرف بين أهله بالمحبة والوداعة والإيمان العميق.

تعلم جرجس مهنة تركيب البلاط، وحصل على دبلوم زراعة، ثم حمل حملًا بسيطًا يشبه أحلام آلاف الشباب: أن يبني بيتًا ويتزوج ويؤسس أسرة كريمة. لذلك سافر إلى ليبيا بحثًا عن الرزق، وعمل بجد واجتهاد، وكان يرسل معظم ما يكسبه إلى أسرته ليبنى بيت العائلة ويجهز نفسه للزواج.

ورغم تعلّقه بأهله وخطيبته، عاد إلى ليبيا مرة أخيرة بعدما ضاقت به الظروف المعيشية، مؤمنًا بأن السعي واجب وأن الله لن يتركه. هناك بدأت رحلته الأصعب، حين اختطف مع مجموعة من العمال المصريين على يد تنظيم إرهابي، وتعرّضوا لأيام طويلة من التعذيب والضغط من أجل إنكار إيمانهم.

لكن جرجس لم يكن مجرد شاب يبحث عن لقمة العيش، بل صار في الأسر مصدر قوة لرفاقه، يشجعهم على الثبات ويذكّرهم بالله، حتى لُقّب بين خاطفيه بـ "الغول" لشجاعته النادرة وعدم خوفه من الموت. وحين خيّر بين النجاة وإنكار إيمانه أو الموت متمسكًا بالمسيح، اختار الثبات حتى النهاية.

وفي ١٥ فبراير ٢٠١٥ نال إكليل الشهادة مع رفاقه شهداء مصر في ليبيا، وعمره لم يتجاوز ٢٤ عامًا. وبعد استشهاده ظل اسمه حاضرًا في قلوب الناس، وتناقلت الأسر قصصًا عن ظهوره ومعجزاته وتعزياته لأهله، ليبقى جرجس سمير رمزًا للشجاعة والإيمان والثبات، وواحدًا من أبرز وجوه شهداء مصر بليبيا.

بداية السيناريو

• مشهد الرجل الراوي مع الشهيد جرجس:

كنت نايم فى سريري، وبعدين صحيت مفزوع، على صوت واحد بيزعق فى وشي وبيقول:

الشهيد جرجس: جري إيه يا أخي.

الراوي: اسم الصليب، اسم الصليب، أنت مين؟

الشهيد جرجس: جري إيه يا أخي، انت ماشي وعم تجول أنا مش اللنبا ابرام انى مش الانبا ابرام، محنا عارفينك كويس انك مش زيبه، لكن ده ميمعش برضيك أنك تتعلم منيه. يا أخي أعطوا تعطوا وستفتح لك كوي السماء. أنت تطول أن اسمك ينكتب فى سفر الحياة.

• الرجل الراوي:

اسم الصليب، أنت مين يا عم؟ وإزاي عرفت تدخل هنا أصلاً.

فلاقيت الراجل الغريب ده قعد يبصلى قوي، وكأنه بيطلع ملامحه فى ذهنى، وبعدين أختفى من قدام عيني، ومقليش هو مين؟

أنا فاكر ملامحه كويس جدا، هو شاب قمحى البشرة متوسط الطول كده، وكان عامل دوجلاس، ولايس تونيه شامسة، وبيتكلم لهجة صعيدي.

كان مليون حماس وإيمان واضح وهو بيكلمنى، صليت لربنا بحرارة علشان يكشفلى حقيقته.



فسمعت صوت بيقولى: ده واحد من شهداء مصر بلبيبا.

جريت بسرعة بحثت عن صور الشهداء، لاقيت صورته جت قدامي على طول. وعرفت أنه الشهيد جرجس سمير اللي الإرهاب داعش لقبوه بالغول، لأنه كان شجاع ومش بيخاف الموت.

فعلاً طريقته وأسلوبه معايا فى الكلام، تخليه يستحق لقب غول الإيمان.

أتولد الشهيد جرجس بقرية سمسوم بمركز سمالوط بمحافظة المنيا، فى ١ أكتوبر سنة ١٩٩١م.

أبوه كان شغال مزارع بسيط على قد حاله، وأمّه اسمها نادية، وكان عنده أخين زاخر وفرج.

جرجس كان بيحب ربنا من صغره، بيصلى ويروح الكنيسة، واترسم شماس على كنيسة مار جرجس اللي كانت عندهم فى قرية سمسوم.

واتعلم جرجس مهنة تركيب البلاط، وحصل على دبلوم زراعة.

• مشهد الأب مع جرجس:

جرجس: أنا عايزك فى موضوع ياأبا.

الأب: خير يا جرجس يا بني

جرجس: بصراحة كده أنا عايز اسافر

الأب: تسافر؟!

جرجس: أيوا أني عاوز أروح لبيبا.

الأب: منت قاعد فى وسطينا يا ولدي، أنت عارف كويس أحنأ بنحك قد إيه.

جرجس: وعلشان انتنوا بتحبوني بيقوا توافقوا على موضوع سفري ده.

الأب: يعنى مافيش أمل أنك تقعد معانا يا جرجس

جرجس: طيب هو أنت شايف أن فيه هنا أمل للشغل علشان أقعد.



• الرجل الراوي:

وسافر جرجس على ليبيا، وقعد هناك حوالى سنة و ٣ شهور، لكنه رجع فى أحداث الثورة الليبية فى فبراير ٢٠١١ ، بسبب الانفلات الأمني الخطير اللي حصل وقتها هناك.

وبعدين دخل الجيش، ولما خلصه قرر يسافر على ليبيا تاني فى سنة ٢٠١٣م، ده بعد لما أشتغل شوية فى مصر وتعب، وفقد الأمل انه يقدر يستقر هنا.

• مشهد الأب مع جرجس:

الأب: ألو أزيك يا جرجس، كيفك وكيف بلديتنا فى ليبيا؟

جرجس: الحمد لله أنا بخير يا بوي، كلنا كويسيين ومرتاحين.

الأب: ربنا دايماً يجعلكم بخير يا ولدي.

جرجس: تعيش يا بوي، بقولك.

الأب: جول " قول " يا جرجس.

جرجس: أنت بتعمل ايه بالفلوس اللي بيعتهالك ؟

الأب: بحوشهالك كلتها مع أمك، متقلقش من حاجة واصل.

جرجس: أنا عاوزك تبني بيها البيت الغربي الجديد، القراط إلا ربع، وتصب لى الدور التاني كمان.

الأب: بس كده، حاضر يا جرجس يا بني غالى والطلب رخيص

جرجس: تعيش يابا، أنت مش محتاج مصاريف ولا حاجة ؟

الأب: وهو أنت سايبنا يا بني منت بتبعث أهو على طول.

جرجس: ده ربنا هو اللي بيعت مش أني، سبها أنت بس على الله.

الأب: ربنا موجود يا ولدي.

• مشهد جرجس مع منير:

منير: كيفك يا جرجس، وكيف أهلك وناسك

جرجس: الحمد لله، كلتنا بخير ياعم منير

منير: تعرف أن كنيسة العدرا والمارجرجس دي هنا بالدافنية بليبيا، كنيسة كلتها بركة.

جرجس: أيوا يا عم منير، أنا كل ما بقعد هنا فى الكنيسة دي فى مكان الشهدا ده، بشم ريحة بخور جميلة قوي.

منير: أنت بتقول ايه بس يا جرجس، منى قاعد معاك أهو مشمتش حاجة ليه، ولا انت بس اللي بتشم وحديك!؟

جرجس: صدقني يا عم منير أنا بكلمك بجد، أني شامم ريحة بخور حلوة بشكل جميل قوي
منير: طيب خلاص، اسكت يا جرجس ومنتكلمش مع حد فى الموضوع ده تاني.

جرجس: حاضر يا عم منير

منير: تعرف يا جرجس أن الشهدا دول كانوا بلديتنا من المنيا، واستشهدوا هنا فى الكنيسة لما الإرهاب فجروها فى ٣٠ ديسمبر ٢٠١٢م

جرجس: مبروك عليهم إكليل الشهادة ويا فرحة السما بيهم

منير: أذكرونا أمام عرش النعمة يا شهداء ربنا يسوع المسيح، الشهيد أشرف سامي والشهيد وجدي ملاك.



• مشهد مكالمة بين جرجس وابوه:

(صوت رنه تليفون)

الأب: ألو، أيوا يا جرجس يا ولدي كيفك وكيف الناس اللي عندك؟

جرجس: كلنا بخير يا بوي

الأب: ربنا يجعلكم دائماً فى أحسن حال يا ولدي

جرجس: بقولك بالحق بابا.

الأب: قول يا جرجس

جرجس: أخبار البيت الجديد إيه؟

الأب: أنا بنيت وصبيت زي ما قولتلى بالضبط

جرجس: عال عال، يعنى كده فاضل التشطيب

الأب: أيوا، ربنا بيعت فلوس وأشطبك أحسن تشطيب يا ولدي.

جرجس: سيبها على الله، اللي بني البيت قادر هو يشطبه، المهم أنا عاوزك دلوقتي تروح تخطب لى بت خالتى.

الأب: حاضر يا جرجس، بس هو أنا يعنى كنت بقول تفكر كويس فى موضوع الجواز ده

جرجس: أني فكرت خلاص وقررت

الأب: الجواز مش بالساهل يا ولدي، ومينفعش ندي للناس كلمة وبعدين يحصل نصيب، أنت عارف أنهم أهلنا وناسنا.

جرجس: لاء إن شاء الله يحصل نصيب

الأب: طيب يا جرجس هنبقي نشوف الموضوع ده بعدين، لما تيجي ربك يسهلها.

• الرجل الراوي:

وبعد مرور شهور قليلة، بدأت الأوضاع الأمنية تتدهور في ليبيا، وصدرت وزارة الخارجية المصرية تحذيرات رسمية بضرورة عودة المصريين العاملين هناك حفاظاً على أرواحهم، وبالفعل نزل يوم ٥ / ٨ / ٢٠١٤ م، ورجع لأهله وخطب بنت خالته، وكان يحاول يشطب في البيت بتاعه.

• مشهد الأب والأم وجرجس:

جرجس: أنى مش مرتاح ياما

الأم: ليه بس يا جرجس يا ولدي بتقول كده ؟

جرجس: أنا اتفقت مع نسايبى إنى هتجوز بعد ٨ شهور

الأم: وماله يا بنى ربنا يفرح قلبك

جرجس: بالوضع اللي أنا فيه دلوقتى ، أنا كده محتاج ٨ سنين ، علشان أقدر أكمل باقى الدهبات وتوضيب البيت.

الأم: عاوز تقول إيه يا جرجس ؟

جرجس: أنى بقول أسافر أحسن الكام شهر دول، وأرجع على الجواز على طول.

الأم: أحنا مش أتكلمنا قبل كده فى الموضوع ده، وأنت قولتلى أنك خلاص هتستقر وهتقعد فى وسطينا.

جرجس: مهو أنا أعمل إيه يا أمى، حتى نفسك مكانى ، أنا سايبها على الله بس الحياة محتاجة سعى.

الأم: أنت يا بنى مش بتشتغل مع المهندس جوزيف فى مديرية المنيا، وبتركب البلاط الجديد هناك.

جرجس: أيوا يامى بس زي ما بقولك كده، مهما أدانى مش هيكفى التشطيب وباقي الدهبات، أنى مجبتش غير نص الشبكة، ولسه فاضل على النص التانى.

الأم تنادى: يا بو جرجس يا بو جرجس

الأب: خير يا أم جرجس خبر إيه؟

الأم: الحق تعال شوف ولدك جرجس، عاوز يسافر لبيبا تانى.

الأب: طيب سبينا لوحدنا شوية يا نادية. هو أحنا مش ريحنا خلاص الموضوع ده، وقولنا معدش فيه سفر تانى.

جرجس: أوعدك يا بوي المرة دي بجد هتكون آخر سفره، علشان ألحق أكون نفسى واتجوز وتفرح بيه.

الأب: صدقنى يا بنى ما عارف أقولك إيه؟ اللى فى الخير ربنا يقدمهولك يا ولدي.

• مشهد جرجس مع أبونا جرجس أب اعترافه:

أبونا: كيفك يا جرجس يا ولدي؟

جرجس: نشكر ربنا بخير يا بونا جرجس، بس أني محتاج صلواتك

أبونا: ربنا معاك يا ولدي، خير؟!

جرجس: أنا خلاص جهزت ورقى يا قدس أبونا، ومسافر بكره بإذن ربنا على لبيبا

أبونا: ربنا معاك يا ولدي، بس ظروف لبيبا اليومين دول مش حلوة على ما نسمع

جرجس: أنا سايبها على الله يا بونا

أبونا: ربنا يحرسك يا ولدي، وعلى إكده هتنزل فى زليطن مع أخواتك أهل قريتنا اللي هناك؟

جرجس: أيوا يا بونا، هنزل معاهم باذن الله

أبونا: طيب ربنا يحميك وصلواتك الست العذرا والشهيد مار جرجس شفيع كنيستنا تكون وياك.



• مشهد جرجس مع أمه :

الأم: خلاص هتسافر يا ولدي ؟

جرجس: ايوا يا أمي، أني خلصت الورق وحجزت الطائرة بكره خلاص من مطار اسكندرية

الأم: يعنى خلاص معدش فيه فايده أنك تقعد وسطينا.

جرجس: معلش بقي ياما، المهم تعرفى مني دول اللي فى الصورة دي ؟

الأم: لاع، وهعرفهم منين ؟

جرجس: دول الشهيدين أشرف سامى، ووجدي ملاك اللي استشهدوا هناك فى ليبيا، جوه كنيسة العدرا والمارجرجس بالدافنيه، لما الإرهاب فجروا مبني الخدمات.

الأم: اسم الصليب، وإيه اللي فكرك بيهم بس دلوقتي يا ولدي؟

جرجس: أني عمري ما نستهم يا ماي، يا بختيهم بالمسيح وإكليل الشهادة، يارتنى كنت استشهدت معاهم.

الأم: اسم الصليب، افكرك لينا حاجة عدلة يا بني، ربنا يخليك لى وترجع لى بألف سلامة وتتجوز وأفرح بيك يا ولدي.



• الرجل الراوي:

وسافر جرجس في شهر ديسمبر سنة ٢٠١٤م للمرة الأخيرة، والحقيقة أن الرحلة المرة دي لليبيا مكنتش بالساهل زي ما هو كان فاكرا، لأن الطرق كانت متعطلة بسبب ظروف البلد ، لدرجة أن أخذ حوالى أسبوع فى الطريق وتعب جدا، واضطر انه ينزل فى سرت بدل من زليطن، ودي كانت أول مرة فى حياته ينزل فيها، واستقر عند قريبه ملاك اللي استشهد معاه بعد كده.

• مشهد جرجس مع ملاك:

ملاك: حمد الله على السلامة يا جرجس

جرجس: الله يسلمك يا ملاك يا خوي

ملاك: أنت تريح النهاردة وآخر النهار ننزل نشتري عدة البلاط، وبكره بإذن ربنا ننزل الشغل مع بعض.

جرجس: أنا بجد مش عارف أقولك إيه، كتر خيرك يا خوي

ملاك: متقولش كده أحنا (كلتنا) هنا أهل وواحد مع بعضينا.

جرجس: حقيقي أهل العور ناس طيبين وكورمة.

ملاك: ربنا يخليك يا جرجس يا بلدياتى.



• مشهد جرجس مع أبوه:

جرجس: ألو بابا

الأب: ألو يا جرجس يا ولدي طمني عليك ؟

جرجس: أنا بخير بابا، بس البلد ظروفها وحشة قوي، فوق منا متخيل لدرجة إني معرفتش أنزل في زليطن

الأب: أمال نزلت فين يا ولدي؟

جرجس: نزلت في سرت عند ملاك بلدياتنا.

الأب: نزلت عند العورة، مع ملاك ابراهيم، تعرف أن ملاك ده أمه تبقى بت عمى أنا.

جرجس: في الحقيقة همة ناس كورمة قوي، جابولى عدة بلاط، وشغل كمان، بس صليلي أنت بس ربنا يسترها علينا هنا

الأب: ربنا يسترها عليكم يا ولدي، مترجع يا جرجس أحسن بدل من القلق ده

جرجس: سيبها على الله يا بوي وهو يدبرهالنا

الأب: طيب يا ولدي أبقي طمني عليك دائماً.

• مشهد تليفون الأب مع الرجل الغريب:

الغريب: ألو

الأب: ألو يا بني من معايا ؟

الغريب: أني واحد غريب أنت متعرفنيش، بلدياتكم من قرية العور اللي جنبيكم، وقاعد مع المسيحين في ليبيا، قاعد وسطهم في السكن اللي في سرت.

الأب: خير يا بني طمني، حصل حاجة لأبني جرجس عنديكم ؟

الغريب: للأسف النهاردة الساعة ٣ الفجر فيه ١٣ واحد أتخطفوا من السكن، ١٢ منهم من قرية العور، وابنك جرجس معاهم من قرية سمسوم.

الأب: أنت متأكد من الكلام اللي بتقولوا ده يا ولدي

الغريب: ايوا طبعاً متأكد، ولو مش مصدقني جرب تكلمه، مش هتعرف توصل له أصلاً.

الأب: طيب يا بني متعرفش مين اللي خطفينوا دول، وعاوزين إيه بالضبط ؟

الغريب: محدش عارف حاجة، يمكن عصابة، يمكن جماعات إرهابية، الأمور موضحتش لسه.

الأب: طيب يا بني يعنى مافيش أمل نقدر نوصل لحاجة .

الغريب: صدقتي ما باليد حيلة، أنا قولت أبلغك وأعمل اللي علي وخلص.

الأب: طيب، كتر خيرك يا بني مع السلامة.

• مشهد الأم بدموع:

ليه مجبتيش ابني جرجس يا عدرا، هو مش انتي أم برضيك وعارفة أن الضنا غالي قوي. كده أتشفع بيكي ومتستجاييش لصلاتي، اسم الصليب بركتك يا ست يا عدرا يا ام النور يا طاهرة، أنا مستحش انك تظهريلى وتجيلي بنفسك، لكن إيه الصورة الغريبة دي اللي بتدهاني، ومالها شكلها سودة كده ليه؟

اسم الصليب دي صورة ابني جرجس، إيه ياربي الرؤيا الغريبة دي، الظاهر أن معدتش هشوف ابني جرجس تاني، وانه هيرجلى بس مش حي، لتكن مشينتك يارب.



• الرجل الراوي:

وفضل الشهيد جرجس مع قريبه ملاك وباقي أخواته الشهدا التانيين لمدة ٤٧ يوم يعذبوا فيهم
علشان ينكروا الإيمان.

وكان دايمًا بيثججهم علشان ميضعفوش بسبب كتر التعذيب، أو كتر التفكير في أهاليهم، فكان
بيقولهم:

الشهيد جرجس:

متخافوش صدقوني اللي بيرعي عيالكم وانتم هنا في الغربية في ليبيا، هو برضه قادر يرعاهم
وانتم هناك في السما . محدش يخاف ، أوعى حد منكم ينكر إيمانه، أثبتوا في المسيح. هنعيش
ونموت مسيحين. تعالوا بينا نصلى ونقول مع بعض كيرليسون .

• مشهد الإرهابي مع جرجس:

الإرهابي: ها هتتكر دينك يا جرجس أنت واللى معك ولا نصير نموتكم ؟

جرجس: أحنا مسيحين ومش خايفين منكم، مكتوب لا تخافوا من الذين يقتلون الجسد، ولكن
النفس لا يقدر أن يقتلها.

الإرهابي: والله منا فاهم مو معنى كلامك هذا؟

جرجس: يعنى كبركم إيه هتموتونا، طب وبعدين بعد كده مش هتعرفوا تعملوا معانا حاجة لأن
أرواحنا في أيد ربنا يسوع المسيح

الإرهابي: والله غول وخسارة في الموت، شجاعتك هذه ما شوفت لها مثيل، إيش رأيك تنضم
إلينا، وبنعطيك مساري إكتير.

جرجس: أنا مبعش مسيحي اللي فدانى واشترانى بدم الصليب، مكتوب من أنكرني أمام الناس
أنكره أنا أيضاً قدام أبي الذي في السموات، مش أنا اللي أبيع ابدتي علشان شوية فلوس زائلة.

الإرهابي: ما حد فيكم ييغى ينكر دينه، إذن أدبوهم.

جرجس: أستني خليني أنا أندبح آخر واحد فيهم

الإرهابي: نفذولوا طلبه هذا، بتصير في الآخر يا جرجس، يمكن لما تتطلع بزمايلك وهمة
بينذبوا قصاد عنيك، ترجع عن اللي في رأسك هذا.

جرجس: أنا كده أطمنت على كل إخواتي أنهم استشهدوا على اسم المسيح، يلا أدبوني بقى
زيهم عاوز أروح بسرعة للمسيح.

الإرهابي: والله غول، الموت والخوف مش ليهم مكان في جنبه هذا، أدبوووه.



• الرجل الراوي:

واستشهد الشهيد جرجس سمير مجلى الملقب بالغول زي ما أطلق عليه الإرهاب فى يوم ١٥ / ٢ / ٢٠١٥م مع ٢٠ شهيد تانيين، وكان عمره وقتها حوالى ٢٤ سنة.

فعلاً كان غول فى الإيمان وعمل زي ما الست رفقة عملت وعيالها أدبحوا على رجليها، علشان تطمن عليهم أنهم كلهم سبقوها للسما وفى الآخر استشهدت هيه. وبعد الاستشهاد بدأت ظهوراته ومعجزاته تحصل مع الناس.

فظهر لأبوه لأكثر من مرة، منها أنه ظهر له على شكل حمامة بيضة جميلة وكان وشها على شكل الشهيد جرجس، فضلت تطير فوق قش الرز اللي كان بتاع أبوه وكأنه بيحرسه ويبطمه أن ميقلش من أي حاجة.

ومرة تانى شافه وهو لابس تونيه بيضا زي بتاعت الشمامسة وقال له :

الشهيد جرجس: أوعى تزعل على يا بوي، أحنا فى مكان كويس جداً ومرتاحين قوي، سبها أنت بس على الله.

• الرجل الراوي:

ومن معجزات الشهيد جرجس أنه ظهر لمرات الأستاذ كامل عوض فى رؤيا وقلها:

الشهيد جرجس: متقلقيش ربنا هيرزقكم بأولاد ، وهيفرح قلبكم.

وبعدها فعلاً بحوالى ٩ شهور خلفت ولد وسمته جرجس على اسم الشهيد، رغم أن الدكتور قالها: نتيجة التحاليل وحشة جداً، وفيه عقم واضح، للأسف مافيش أي أمل فى الخلفة خالص.

ومن معجزاته كمان:

أنه كان فيه واحدة اسمها دميانه كانت تعبانه جدا والدكتور قالها:

فى الحقيقة أنا مش عارف أقولك إيه يا مدام دميانه، أنا جربت معاكى كل الأدوية والعلاجات الممكنة، لكن للأسف مافيش نتيجة خالص ولا مؤشر للشفاء.

دميانه: وإيه العمل دلوقتى يا دكتور؟

الدكتور: العمل عمل ربنا، علاجك مش عندي، أنتى محتاجة معجزة، محدش عارف أنتى عندك إيه أصلاً.

دميانه: ربنا موجود يا دكتور

الدكتور: مع السلامة.

• صلاة دميانة:

ياربي يسوع الغالى أنت اللى شفيت المرأة نازفة الدم بعد كل ما خلصت فلوسها على الدكاترة وبرضه معرفوش يعالجوها، لكن لمسة منك كان فيها الشفا، قادر يارب تشفيني زيها، يارب أنت اللى خلقت عنين للمولود أعمى، وقومت لعازر بعد ما أنتن فى القبر، قادر يارب تشفيني بشفاة قديسك الشهيد جرجس الغول، شهيد مصر بليبيا أمين.

• الرجل الراوي:

وبالفعل حصلت المعجزة وخفت دميانة من غير أي علاج، بركة ربنا والشهيد جرجس سمير، غول الإيمان، وشهداء مصر بليبيا تكون مع جميعنا ولربنا المجد الدائم أبدياً أمين.